

Was machsch dur's Johr?

Im Früehlig han i mängisch dänkt,
ob dr Osterhas dir öppis schänkt?
Chunnt er dy i dym Huus cho bsueche?
Darfsch du dir au es Näschtli sueche?

Flügsch im Summer au dervo,
wohnsch imene Hotel irgendwo?
Ligsch am Strand und gosch go schwümme,
oder bisch scho z'alt und magsch das nümme?

Im Herbst hesch sicher gar kei Rueh,
muesch d'Frücht und d'Nüss i Chäller tue,
machsch Beerli y, tuesch d'Bäumli stutze,
tuesch holze, flicke, s'Hüüsli putze...

Öppis aber weiss i guet: Im Winter,
wenn's de schneie tuet,
bisch du deheime am Bache,
und bringsch uns feini Sache!